



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

**Namibia Tir Hage
Geingobi süogo**

**Delhi sorkari budget nungi shilem 40
school nung indoker: Kejriwalkokogo**

VOL. XXI ISSUE NO. 113 (ADOK 113)

DIMAPUR TENTONÜ (MONDAY)

TSÜKLAI (FEBRUARY) 05, 2024

₹ 5.00

Mkg. mi lendong nung shishilembaba takdang 62 meshimeshia rongtok



(Abelen) Mokokchung Municipal Council Shopping Complex rongtokker aliba noksa. (Achiji) Mokokchung Municipal Council Shopping Complex rongtokba dak sentakba nung February 4 nü Mokokchung Deputy Commissioner Thsuvisie Phoji-er kidang shisa lemsatepba senden ka jatepa amenba mapang tangokba noksa.

Mokokchung, February/ Tsüklai 02 (TYO): February 03 aonung ajungbena Mokokchung Municipal Council, Shopping Complex nung mi adoka arongba dak sentakba nung Mokokchung Deputy Commissioner Thsuvisie Phoji-er tanü February 4 nikongdang 2 ako nung par kidang Ao Senden, Watsü Mungdang, Ao Kaketshir Mungdang, All Ward Union Mokokchung, Mokokchung

Municipal Council, District Disaster Management Agency, Mokokchung Chamber of Commerce & Industries SRDF aser Fire Services pur den shisa lemsatepba senden ka jatepa menogo.

Ajungbena dang Shopping Complex nung mi lendong atalok aser iba lendong ya tekaraba nung tembangdaksütsü asoshi tata department balalai inyakba den nüburtemi atsüayong mesüi

yaritepba ajanga iba mi lendong ya tulukabo küma mao, anungji iba lendong atalokba mapang tangatetba tajung nung yariteper ajak dang district administration tenung nung Mkg. DC ajanga pelaba metetdaksü.

Iba lendong atalokba mapang nung Mokokchung nüburtem dak aketba tangatetba tajung ni kuli süa asangsang nung nguogo. Anungji tarutsü anogotem nunga iba kasa tangatetba nung lendong balala atalokba mapang aser nungtakba mapang nung inyaksüla ta Mokokchung DC-isa lephsia ashi.

Mokokchung Deputy Commissioner Thsuvisie Phoji-isa tang rongtokba nung teyari ama ajak menakrepa rongtokker 62 nem sen 10000/- aser terara raksar 73 nem sen 5000/- teyari agüja atatsü ta metetdaksü.

Iba den külem takdang kwi rongtok itemji tejangja züludener teyari asoshi sorkar nem tezüluba nung agütsütsü ta paisa metetdakja liasü.

Senden nungsa Ao Senden Tir Wb.Chubawati-i jembidang Naga lima nung taoba mapangtem nung tanga district-tem nung iba ama lendong atalokdang Nagaland sorkar teyari tulu

agütsüba ama tang Mokokchung nung atalokba mapang nunga agütsütsü asoshi teinyakeri sorkar den tapet teinyaksü inyaksüla ta ashi.

Mokokchung Chamber of Commerce & Industries Tir Wb. Tsükti Longkumeri jembidang takoksa ajurur alirtemji ajak asen nisungtem dang lir, parnok iba shishilembaba ajanga dang pei taküm aser kibong mesüa alirtem lir, anungji parnok metitemi shishilembatetsü asoshi administration-i tekaratiba nung parnok khen atema asüyonga shishilembatsü asoshi anepalutsütsü kanga dang nungtaker ta lemsatep.

Tir-isa shishilembartemji timbaka tetsürtem lir, anungji iba ama lendong atalokba mapang nung tetsürtem nem mejeteta teyari agütsüba lira ibajia lenmang bushitsütsüla ta shisem.

Ao Kaketshir Mungdang Tir Sb. Lanutoshi Aier-ia shilem agia jembiba mapang nung iba ama lendong tulu atalokker takoksa tulu ajurur alirtem yaritsü asoshi nüburtem yaritsü asoshi temelunger tenla sarutsü junger ta lemsatepba nung iba mapatong inyaksü asoshi District

Administration-i nem inyaksü nunglokttsü.

Mokokchung nung yasung February 3 aonung iba mi lendong tulu atalokker nüburtem mulung zürep tia nung aliba osang angashia Minority Affairs & Sericulture Advisor Imkongmar Mokokchung-i arua iba senden nung dener kelen pai Shopping Complex rongtokba semdanga liasü.

Iba Shopping Complex ki ya Mokokchung nüburtem kisung asoshi dang masü saka ya Naga nunger rajak meyong lir, tanü Mokokchung nung iba takoksa ajuruba ya Naga nunger ajaki takoksa ajuruba lir ta Advisor Imkongmar-i ashi.

Minority Affairs & Sericulture Advisor-isa PDA sorkarji nüburtem asoshi lir, anungji PDA sorkari nüburtem den teti lir, anung Mokokchung nüburtemi shimtetba MLA onok ter-i iba takoksa atalokba osang sorkar den lemsatepa tapet teyari bener aruagi yariteptsüta lemsatep.

Minority Affairs & Sericulture Advisor-isa pa Mokokchung-i tsüngdong aruagi lendong atalokba tesem semdangba den pa rongtak teyari nung amshitsü asoshi sen lakh asem (300000) teyari agütsü.

February 3 aonung MMC Shopping Complex nung mi ya 9:00 ako meta adok aser Mi ya first floor nungi adok tabo jangaago, saka tang tashi nung iba mi ya komasür adok ibaji mejangjateter.iba lendong atalokba ajanga tasüba aser teyiruba kecha maliasü. Tia kaa teyariteper aika aliba ajanga osettsüset aika agizükteta liasü.

Kanga dang tesasatsü kaji Mokokchung Municipal Council-i anepaluba tzü reserver tank tulu lir saka tzü atsütetba kol majungba ajanga iba tzüji magitet.

NE tesem aika nungi AFSPA agienogo: PM Modi

Guwahati, February 4, 2024 (Agencies): February 4 nü Prime Minister Narendra Modi-i Guwahati nung public rally ka nung jembidang Northeast kübok district aika nungi AFSPA (Armed Forces Special Powers Act) agienba ajanga yimjung aruogo ta ashi.

Assam nung lanur 7000 temai ozung alema inyaksangshi toktsüogo aser temai adokogo ta PM Modi-i ashi.

"Northeast nung yimjung aser terenlok putu ka süir. Lanur 7,000 temai prangpong toktsür linük renloktsüba mapa nung shilem agir. Tesüiba mapang ozung alema inyaksangshiba tesem aika nungi AFSPA agienogo aser sorkari parnok taginübatem asoshi inyaksüdar" ta Khanapara, Guwahati nung PM Modi-i ashi.

"Testüiba sorkartem alizung tulutem metongtet mesüra nangzükbatem meinyaktet. Tang onoki tesüiba sorkartem tangatetba melenshitsuogo" ta paisa ashi.

Prime Minister Narendra Modi-i Assam renlok daksüba aser yimjung bentsür aruba ateam tenüngsang agütsür ta Assam Chief Minister Himanta Biswa Sarma-i ashi.

Modi-i Assam nung yimjung bentsür aru aser lanur aika telungpur mapa nungi piladaksür temai adokogo ta CM Sarma-isa ashi.

Deobarnü Prime Minister Modi-i Rs 11,600 crore mapatongtem inyaksü lung azungtsü. Iba ajanga connectivity tajungba akümtsü, mapa adokdaksütsü aser saisapongbaren ajungkettsü.

PM-i Assam semdang saka Manipur mesemdang: Congress

New Delhi, February 4, 2024 (Agencies): Prime Minister Narendra Modi-i Assam semdang saka timtem aliba Manipur state bo mesemdang ta Congress lennir Pawan Khera-isa ashi.

Khera-isa February 5, 2024 nü Guwahati aser Imphal tsüngda tayimtsü senzütsüba den jenjangtem indang noksa kar lemsatepogo.

"Dear PMO India. Himanta (Assam Chief Minister)-i na atema helicopter ka book sütsüra kecha masü. Yamaji mesüra asung Guwahati aser Imphal tsüngda tayimtsütem yamai lemsateper. Tayimtsü book asütsü süra onok nem osang

sangokjangma" ta paisa ashi.

Külen, Congress lennir Jairam Ramesh-ia PM Modi-i Manipur masü Assam semdangba aitsüogo.

February 3 nü Manipur Chief Minister N Biren Singh-i Union Home Minister Amit Shah den ajurutepba osang ka lemsatepa "Manipur nung BJP maliba ya temeten magütsüba inyakyim ka lir" ta Ramesh-isa ashi.

"Ita 9 jungogo saka Prime Minister den senden kecha mali. PM-i Manipur atema ola kecha madoker. PM-i road show ka atema Guwahati-i aoer saka Imphal-ibo maor. PM-i Manipur nung alirtem nem temeten magütsür" ta Jairam Ramesh-isa ashi.

Tezpur nung US senso anati sayutsüngiba atema senchi achi

Tezpur, February 4, 2024 (Agencies): Assam Police-i February 2, 2024 nü America nunger ana- John Matthew Bone aser Michael James Flinchum na apu.

Tenati visa telatetbatem alema inyak kechiyong tena tourist visas bener India-i aru saka Khristan yimsü prokshi ta tai tonglokttsür.

Tezpur tesem nung alirtemi Sonitpur police tsüngdang ken o benokba sülen tena Baptist Christian Hospital anasa apu.

America nunger anati visa rules alema tamangba yimsü sentongtem nung aden aser arogotemi ayongzükbata sentongtem nung o jembi ta Kacharigaon police station nung ken o ka benok.

"US senso anati ozüngi memelaba tamangba yimsü dak

sendakba mapa inyakba atema tena dang \$500 senchi chiogo. Tena dang India sen Rs 41,486 talila achi" ta Sonitpur Superintendent of Police Susanta Biswa Sarma-isa ashi.

Iba tatalokba atema formal case kecha mebenok saka Ministry of External Affairs nemo sang sangoktsüogo. Tena dang tamangba yimsü dak sendakba sentongtem nung shilem magitsü shiogo ta SP Susanta Biswa Sarma-isa ashi.

"Onoki tena yakünü apu. U.S. tourists anati sayutsüngiba mapa inyak anungji tena shia dang Visa regulations nung lateta aliba ama \$500 senchi achi" ta Sarma-isa ashi.

October 2022 nunga Assam nung German nunger 7 aser Swedish nunger 3 apu. Parnoki visa norms alema missionary

mapatem nung shilem agiba atema tai tongloktja apu.

Item tatalokba ajanga bendangertem tourist visas bener Assam-i arur aser lisopur o süngolu aliba tesemtem nung tamangba yimsü sayutsüngir. Iba inyakyim atema Hindu teloktemi ola adoker.

Tesüiba nung Assam chief minister Himanta Biswa Sarma-isa tamangba yimsütem dang education aser health facilities agüja Hindu nunger tamangba yimsü memelendaksütsü mepishiogo.

Bendang linük balala nungi Christian missionaries-i tourists ama northeast state balalai arur visa norms alema tamangba yimsü meyipdaksüba mapa inyaker ta aitsüba mapang CM Sarma-isa osang metetdakja liasü.

PM Modi-i Manipur mesemdangba Congress-i aitsü



Ato Kilonser Narendra Modi-i Assam semdangba mapang Manipur mesemdangba asoshi Congress lenir Pawan Khera-i aitsü.

Guwahati, Tsüklai/February 04 (Agencies): Ato Kilonser Narendra Modi-i Assam semdangba jajaba nung kidanger Manipur state mesemdangba atema Congress lenir Pawan Khera-i Deobarnü aitsü, kong taoba küm May ita nungi kin balala tsüngta mepetmesü adoka lir.

Khera-i Hombarnü (February 5) Guwahati nungi Imphal-i aoba tayimtsü aser tayimtsü nung amentsü jenjang keter aliba screenshot noksa ka social media nung lemsatepa liasü.

PMO India dang tuyua tweet ka nung, "Temeim PMO India,

Himanta (Assam Chief Minister aser BJP lenir)-i na atema chopper ka agütsüra aji junger. Aji mesüra asüng Guwahati aser Imphal tsüngta tayimtsütem yamai lir. Ticket mükaa ayutsü asoshi nüngdakra onok nem metetdakjang," ta zülua liasü.

Parnoki screenshot agütsüba nungya tayimtsü indang ticket jenjang ya sen 2,500 nungi 5,000 tashi liasü.

PM Modi-i Manipur semdangtsü melen Assam semdangba atema Congress lenir Jairam Ramesh-ia aija liasü.

Honibarnü Manipur Chief Minister N Biren Singh-i Union Home Minister Amit Shah den ajurutebpa osang lemsatebpa mapang, Manipur nung BJP maliba ya kanga dang tim masü ta Congress lenir tejen, Jairam Ramesh-i ashi.

"Ita toku süyigo aser PM den ajurutebpa mali, shiba Manipur asoshi tang tashi ola madoker. PM-i road show ka atema Guwahati tonga oteter, saka Imphal-ibo moteter aser maotsü. PM-i Manipur nübur asoshi kanga dang tim masüba yimya amshir," ta Jairam Ramesh-ia tweet asü.

Assam Rifles temi 2023 küm NE nung kozü tonnes 4428 apu



Guwahati, Tsüklai/February 04 (Agencies): Assam Rifles temi Northeast kübok state asem nung 2023 küm January ita nungi December ita tsüngta areca nuts (kozü) shibelentsü merangba tasa aika raksaja international market nung sen crore 156 jenjang kozü tonnes 4428.314 pua liasü.

Assam Rifles temi item ya Manipur, Nagaland aser Mizoram nung apu, koba Myanmar nungi India-i shibelena aruba mapang pua liasü.

2023 küm Assam Rifles temi Manipur nung sen crore 95 jenjang areca nuts tonnes 2712.704 apu, Nagaland nung sen crore 37 jenjang tonnes 1032.96 apu aser Mizoram nung sen crore 24 shi jenjang tonnes 682.65 apu.

The Sentinel of the Northeast ta ajaba paramilitary force yagi kasa mapang ozüng alema shishilembaba nung

shilem agir nisung aika apu aser ano India aser Myanmar registration number aliba garia noklang aika apu.

Maneni 2024 küm tenzüker January ita kisüng nunga Manipur kübok Kamjong district nung Assam Rifles temi 'grey market' nung sen crore 82.54 jenjang areca nuts shibelenba apu.

Areca nuts shibelenba, talisa Burmese areca nuts ya Northeast nung kanga boloa angur, kechiaser Northeast ya Myanmar den international borders kilometre 1,643 talang lir.

Manipur ya iba linük den arütsü kilometre 398 lir, Mizoram ya kilometre 510, Arunachal Pradesh ya kilometre 520 aser Nagaland kilometre 215 talang arütsü lir.

Item areca nuts ya region nung Indo-Myanmar international borders ajanga bener aiter aser linük tesem

balalai belenshir.

Shibelenba areca nuts ya Myanmar nungi Northeast tesem balalai bener aiter aser iba sülen Dimapur mesüra Assam-i bener aor aser iba sülen linük tesem balalai belenshir.

Areca nuts yagi temang nung timtem agüjaka South Asia tesem ajungalen kanga mejaker. 2021 küm kidanger linüktem nungi areca nuts shibelenba bushisüngdangtsü atema India nung bushisüngdangtsü totuyuba agüja liasü.

Areca nuts dak alaka shibelener temi temesepba mozü, nok-nü aser injang-bomb, arem shiruru, hon aser danga osettem Myanmar nungi India-i bener aiter.

2023 küm Manipur kübok Ukhrul aser Tengnoupal district tem nunga Assam Rifles temi grey market nung sen crore 200 jenjang temesepba mozü pua liasü.


Gauhati High Court nung CJ inyaksü Justice Vijay Bishnoi shimogo

Guwahati, Tsüklai/February 04 (Agencies): Gauhati High Court nung Chief Justice inyaksü nübu tasen, Justice Vijay Bishnoi shimogo.

Ministry of Law and Justice, Government of India kübok Department of Justice indang appointment division ajanga iba osang ya metetdaksü.

Constitution of India indang Article 217(1) nung tashi agüja aliba ama taoba mapang Rajasthan High Court nung Judge inyaka alisang Justice Bishnoi ya mapa agizükba anogo nungi Chief Justice ama inyaksü nungloktsür ta sangdong nung ashi.

Constitution of India indang Article 217 indang clause (1)



Justice Vijay Bishnoi

nung tashi agüja aliba amshia Tiri Rajasthan High Court indang Judge, Justice Vijay Bishnoi ya Gauhati High Court indang Chief Justice inyaksü shimer, ta sangdong nung ashi.

Assam kübok constituency tasenba atema ticket rakteper

Udalguri, Tsüklai/February 04 (Agencies): 2024 Lok Sabha election tonga arur aser Assam nung constituency tasenba, Udalguri-Darrang HPC constituency nung yimtenren tsütsü inyaksangshi balala angur. Party tulutem mazüngi tasa yanglur aser tekolok tsükteper, kong ticket rakteper jenti lir.

Tang teinyakdak MP Dilip Saikia ya par party telungzük nung tayongzükba tulu ajurua lir. BJP lenir aser MP tejen, Ramen Deka-ia ticket aginer, anungji party telung nung atsüteper. Tenaprong ya nübu tejangja, anungji BJP tekolok atsüker.

Külen Hagrama Mohilaru-i aniba Bodoland People's Front (BPF) ya candidate balaka

yoktsü asadanger. Osang ajanga ashiba agi, lenir tejen aser Kalaigaon MLA Durga Das Boro ang shimtsü amai lir.

Kasa mapang party 15 agi kumtetba United Opposition Forum Assam (UOFA) nung züngsem, Congress ya candidate ka yoktsü amai lir. Taoba mapang MP alisang aser lawyer Madhab Chandra Rajbongshi ya tokteptsü amai lir.

2021 Assembly polls nung AIUDF aser BPF ya Congress-i aniba Mahajot alliance nung züngsem liasü. Ajisüaka election nung tamakok ajuruba sülen BPF ainshi aser BJP-i takok anguba nung yari ta tai tonglokja Congress ya AIUDF den pila liasü.

BJP Mokochung district ketdangsürtemi sentong ka agi



Dimapur, Tsüklai/February 04 (TYO): BJP Mokochung District indang incharge aser co-incharge pur atema sentong ka takok ngua agia liasü.

Iba sentong nung BJP Mokochung district ketdangsürtem, District Morcha ketdangsürtem aser Mandal ketdangsürtem dena liasü.

Iba sentong nung BJP Mokochung District tir S. Bendang Aier-i pela agizükba o jembia liasü. Kheveshi Sema-i iba sentong nung jembidang Mokochung District kübok BJP ainba aser Nagaland nung

national party ka ama party jenjang karyakartas tem den lemsatepa liasü.

K. Konngam Konyak-i karyakartas tem dang party principles sülen shidak anidaksü ajungshi aser tamangba yimsü aser politics memeyokteptsü ajungshia liasü.

Iba sentong nung karyakartas temia metokmeperi aser tayongzükbatem lemsatepa liasü.

Iba sentong nung adener aser karyakartas ajunga dang maneni party ajungtsü asoshi meranga inyaksü ajungshitepa liasü.



February 04, 2024 nü Patna nung aliba Jai Prabha Medanta hospital nung cancer ward ka semzüksüba sentong nung Bihar Chief Minister Nitish Kumar aser Medanta The Medicity Chairman aser Managing Director, Naresh Trehan na noksa nung angur.

Delhi sorkari budget nungi shilem 40 school nung indoker: Kejriwal

New Delhi, Tsüklai/February 04 (Agencies): Amongnü Central sorkar aija Delhi Chief Minister, Arvind Kejriwal-i, Centre sorkari school aser hospital atema budget nungi senotsü shilem 4 dang indoker, ajisüaka Delhi sorkaribo tesüiba küm 8 tashi schools aser hospital atema budget nungi shilem 40 lezmükja indoker, ta metetdaksü.

Amongnü AAP tongti lenir, Kejriwal aser Delhi Education Minister, Atishi Singh nati linük yimtiba nung aliba Rohini nung school pezü atema building tasen yanglutsü asoshi foundation lung azüingja liasü.

Iba sentong nung jembidang Kejriwal-i, "Onoki schools, mohalla clinics aser hospitals semzüksütsü atema aoba mapang nung tanga party tem

nungi züingsemtemi item tesem jagi arua onok anema yimyim ayimer. Tanü anogo yabo balaka, kechiyong school pezü semzükogo. Tanübo tesempatsü politics masayatsüla. Linük tesem ajaklen Centre sorkari schools aser hospital atema budget nungi senotsü shilem 4 dang indokba nenoki osangkakettem nung zünger alitsü akok. Tesüiba küm 8 tashi Delhi sorkaribo schools aser hospitals atema budget nungi senotsü shilem 40 indokogo," ta metetdaksü.

Delhi Chief Minister-isa, "Mapang ka nungbo Delhi nung sorkar school tem jenjang kanga mejungi liasü aser nija school tem nung fees aika asübayong sensakertemi pei chirnurtem sorkar school temi yoktsüsa aküm," ta metetdaksü.

"Delhi sorkar school tem nung shisaliok tazüingla liasü. Tanübo sorkar school pezü semzükba sentong nung lokti tulu adenshir, iba tetezü nüburtemi pei chirnurtemi shisaliok tajung angutsü, ta teimla akar," ta Kejriwal-isa ashi.

Sensakertemi pei chirnurtemi shisaliok tajung mangutsü ta bilema liasü, ajisüaka tanübo sensakertemi sorkar school tem dak teimla akar, ta pai ashi.

"Tanübo sorkar school tem nung infrastructure, tesayurtem aser results ji nija school tem dang nungi tajungba. Tanü semzükba school pezü nung tanur 10,000 dak tema züingtettsü. Küm ka tsüingda item school tem renemtsü atema tanü tamendakdak yangluogo," ta pai ashi.

Nisung shibelenba atema NIA-i Myanmar nunger 3 anema ken o benok

New Delhi, February 04 (Agencies): National Investigation Agency (NIA)-i nisung shibelenba dak sendakba nung Myanmar nunger asem anema ken o benokogo.

Myanmar nungertem jagi ozüing alema India telungi ait aser India nung Rohingya tsürtem kangshia kibong kümdaktsüba nung shilem agia lir, ta NIA-i metetdaksü.

Ozüing alema linük telungi aitba, bendangertem talisa Rohingya nunger India-Bangladesh arrtsü adena shibelenba atema NIA-i Myanmar nunger asem anema ken o ka benokogo.

Tai tonglojka alir asemji Rabi

Islam (alias Rabiul Islam), Shafi Alam (alias Sofi Alom, alias Sayedul Islam) aser Mohammad Usman nunger lir; parnok ajak Myanmar kübok Maungdaw district nungi lir. Parnoki ozüing alema India telungi ait aser parnok ket nung travel documents maliasü. Ozüing alema arrtsü ajanga bendangertem aika linük telungi aiddaktsüba nung parnoki tongti shilem agia lir, ta NIA-i metetdaksü.

Par asem jagi Bangladesh nungi Rohingya Muslim tsürtem dang India nung aliba Rohingya teburtem den kibong kümdaktsütsü, ta tiyazü nangzüka parnok shibelenba

liasü. India telungi anir aitba sülenbo tetsürtemji Uttar Pradesh, Rajasthan, Jammu & Kashmir, Telangana aser Haryana state tem nung teburtem den kangshia kibong kümdaktsü.

Bushisüingdangba mapang nung Rabi Islam aser Mohammad Usman na ket nung taila kuli kakat aika aliba aser Aadhaar cards aliba putetogo. Aadhaar cards ji amshia SIM cards aika agi aser bank accounts lapoka liasü.

Yaküm November 7 nungi NIA-i iba ken o bushisüingdang tenzüka liasü aser tang tashi nung parnoki nisung aika shibelenba kuli jangaogo.

Ladakh nung nüburtemi longkak aita state jenjang akhanger

New Delhi, February 04 (Agencies): Leh nung nisung meyrjang aika adenshia kanga temekong tizükteta longkak aita Ladakh atema state jenjang aser linük temzüing nung 6th Schedule kübok tekümzükba agüjang ta akhanger.

Leh Apex Body (LAB) aser Kargil Democratic Alliance (KDA) nati ayongzükba longkak aitba sentong nungji tetsür-tebur meyrjang aika adenshia shilem agir.

Centre sorkari parnok takhangbaji meteta Union minister of state for home, Nityanand Rai leniba kübok high level committee ka tenteta Ladakh nunger sobaliba aser oshi kümzüksü atema inyaktsü tuyuogo. Ajisüaka longkak aitertemi, 2019 küm Ladakh union territory kümtsüba sülen parnok tashi kanga ajema kümogo, ta ashir.

Tamalen Ladakh ya Jammu & Kashmir shilem ka asüba mapang nung assembly nung Ladakh nungia menden pezü aser legislative council nunga menden ana liasü, ajisüaka 2019 küm August ita nung sorkari

Arrla 370 agienba sülen Ladakh ya Jammu & Kashmir den piladaktsür Union Territory ka aküm.

Osangbener den jembidang Leh Apex Body aser Kargil Democratic Alliance atema legal adviser, Haji Ghulam Mustafa-i, nüburtem nem agüja aliba tashi ajema kümogo aser assembly nung Ladakh nungi züingsem mali, ta metetdaksü.

Mustafa-isa, "Ladakh ya union territory ka akümiba mapang nungi Leh apex body aser Kargil Democratic Alliance (KDA)-i onük pezü benoka liasü. Nüburtem nem agüja aliba tashi ajak ajema kümogo. Onok Jammu & Kashmir shilem ka asüba mapang nung Assembly nung züingsem pezü aser legislative council nung züingsem ana liasü saka tangbo Assembly nung ozü züingsem mali. Assembly nung Ladakh nunger atema menden lezmüksütsüla aser onok nem state jenjang agütsütsüla. Ladakh ya asalentong tsütsü kanga tongtibang tesem ka lir, anungji onoki akhangbaji ataloktsütsüla," ta metetdaksü.



February 04, 2024 nü New Delhi nung Delhi Police Crime Branch nungi ketdangsertem Delhi minister, Atishi Singh-i kidangi oa 'notice' ka agütsüba sülen meyipa aodang tangokba noksa nung angur. Atishi-i, BJP-i AAP MLA tem alizüksü meranger, ta tai tongloksüba dak sendakba nung la nem 'notice' agütsü.

February 6 nü Uttarakhand assembly nung UCC Bill benoktsü

New Delhi, February 04 (Agencies): Uttarakhand state nung Pushkar Singh Dhama-i aniba cabinet-i Uniform Civil Court (UCC) draft atema o lemtepar; cabinet-i iba draft agizükba sülen state assembly nung iba bill benoktsü, ta osang ka ajanga metetdaksü.

Osang angazükba agi, Amongnü nikonngang Cabinet senden nung iba draft benoka o lemtepogo. Supreme Court nung tamalen judge, Ranjana Prakash-i aniba UCC drafting committee-i Hokolbarnü Chief Minister Pushkar Singh Dhama nem UCC draft agüja liasü.

Uttarakhand Chief Minister Dhama leniba nung amenba senden nung UCC draft report ji agizükba sülen February 6 nü sorkari state assembly nung Uniform Civil Code bill benoktsü.

Iba bill agizükra linük nung mezüing iba bill agizükba state ji

Uttarakhand asütsü.

UCC ya state nung yimsü balala amangertem ajak atema kasa ozüing benoktsü atema lir.

1961 küm Goa nung nütsüing lakh 6 shi dang aliba mapang nung parnoki Portuguese Civil Code maneni benoktsü lemteta liasü. Iba telemtetba agibaji ajanga yimsü ajak atema uniform civil code aliba state ji Goa dang lir.

UCC ajanga yimsü balala amangertem ajak asoshi kiyimba, balalulaba, kimong, kiojen aser senmangba dak sendakba ozüingtem kasa dang asütsü.

2022 küm Uttarakhand nung assembly election atema nüboyimba mapang nung BJP-i state nüburtem dang parnoki takok ngura UCC Bill agizüktsü, ta nangzüka liasü.

Union Home Minister, Amit Shah-i linük tesem ajak Uniform Civil Code benoktsü, ta sabang balala nung aiben jembia lir.



February 04, 2024 nü Patnitop nung aliba Jammu-Srinagar national highway nung rürjep merüktetba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, FENRUARY (TSÜKLAI) 05, 2024

Mapa makadak mekazütsüla

Mapa manguba aser meinyakba tebilemtsü ya lanurtem asoshi dang masü saka taintem asoshia lir. Item tebilemtsüji kodang bilemdangdir, asenok kari mapa makadak mapa bushir, kari mapa inyak mashi ser mapa bushir aser ano karibo mapa akadak alir ser nung mapa meinyaknuba agi mapa mangur. Item ajakji alima nung tali meshizük aliba purtem lir, kechiyong alima nungbo mapa ya taküm junga alitsü asoshi chiyongba chiyongtsü amai lir. Mapa inyak nung dang temang anema alir, tokolok aser shisatsü agi rajema mapa inyaker aser taküm alitsü nungdak angur. Aji oda, senotsü aika akaba agi mapa meinyak ser chiyonga dang kazüra tashidak bendenerba dang asütsü. Asenok rongnung iba amaji takar asüba agi mapa meinyak chiyongjema kazürtem aika lir. Itemji mapa meinyak ser ayongayonga shi angu den chiyonga alima nung amonger asünungji jangratema alir amai bilema alitsü, saka ibaji peisasa pei arishi temdoka amongertem lir. Talisa, tanü asüng lanurtem dang masü saka government mapa nungi anenertem aika Dimapur aser Kohima nung pei akaba ajak agi ki ka yanglur yangji soruchioka chiyongerbo television aser mobile phone na nung mapang endoka anogo meinoktsür. Atangji, government mapa nung arishi küm 60 tashi mesüra mapa nung küm 35 tashi inyaka arur pension angurji, joko, tanüngba anogotemjibo kecha meinyak anisüngzüka alitsübaji shitak amai bilemtsü. Ajisuaka, alima nung taküm ali tashi mapa inyaksübaji angu asoshi tzü amai lir. Tetezü, mapa meinyakra temangia mapa meinyaktsü, anungji taküm alitsübaji mekoki akümstsü. Ano, tangatetsü kaji taküm aliba ya mapa inyaktsü atema agütsüba tashi aser mapang ka lir, anungji mapa meinyakra taküm alitsü menügdaker. Iba tangatetba nung, talisa, government mapa nungi 'retire' ser alirtemi Kohima aser Dimapur ama nung pension sen chia kecha meinyaki kazütsü agibo, pei yimtak oagi alu tapu ka mesüra ka yima alu nungji farm house tajung ka yanglur, yangji temang nung tashi itta ali tashibo mazüngi anogo shia asentzü endoka mapa inyaka alitsü mulungtet nung junger. Atangji, Dimapur aser Kohima nunga karibo alu yimtettsü saka aikati alu ayimtsüsabo Kohima aser Dimapur nung ali malitetsü. Ano, külen asenok tsürabur yimtaklenbo aluyimtsü ali peria lir ser nung aluyimer mali arem nungi tagitsü kecha madokdaksütet timtema alir. Tanü putu nung tangaribo tagidak makaba janoana agia rongsen küma yanglur amshidang, asenokbo rongsen agi tagitsü mali janaona kümdaktsüba mapaji alu mayim ali tazüng ayuba ya asütsü. Atangji, takokeribo Kohima aser Dimapur ama nung ki yanglubajia teindok masü, ibajia rongsen asütsü. Ajisuaka, asen tanüngba akümüli piyong kazüa amongtsü asoshi bilema ki asüba tangatetbajiang melenshir, asenoki asen akaba rongsen aser mapang ajakji langka tajung adokdaksüba mesüra yanglutetba nung amshitsü bilema inyakra, iba jagi asen dang masü nübortema ajangzüksü. Asenok rongnung nisung aika peisasa mapa ka tenzüka inyaknuba senotsü makaba agi metenzüktem timtema purtem lir. Iba jagi balaka lanurtemi government mapa bushir. Ajisuaka, government mapa nung inyaker mapang shitak nung temang shitak lia anenertem asoshibo shitakba pei jangraba inyaktsüba mapangji mapa nungi pension anguba sülenji dang asütsü. Ibaji angateta kodang government mapa nungi anenertem inyakdir, alima nung taküm anaben ali ama pei asoshi aser chirnur aser semchirsemnurtem asoshi dang masü saka nübortem aika asoshi temoatsü tajangzük tulu agütsür taküm asütsü. Idangjibo tangar kilir masü kibur asütsü aser mapa bushir masü mapa agütsür asütsü. Iba jagi dang asenoki asen lima ya mapa inyaker meinyakma adokba temo aketba lima tajung ka kümdaktsütetsü.

OLEMSABANG

Tsüngremi lennir asütsü ajaba aser shimtetba

~ L. Kika Pongener.

Asenoki laishiba nung züngdangra, Tsüngremi putu mapang balala nung nubur madak lennir asütsü atema nisung balala ajaba aser shimtetba angutsü. Nisung karbo pai/lai memelungi nungnanga, tatemtsü o aika jembiaka, odang kangshia ajaba aser shimtetba-a angutsü. Ano nisung karbo ken o nunga tetangshi lennitsü tetemsu nubu tajung sernung, Tsüngremi majaba aser meshimtetba-a angutsü. Ano nisung karbo Tsüngremi maja aser meshimtetba sernung pei sasa lennir sunuba-a karbo angutsü. Ano nisung karbo Tsüngrem-ia shimtetba aser nubur-ia shimtetba sernung, pei sasa pei jenjang raksaba-a angutsü. Ano nisung karbo Tsüngrem-ia meshim aser nubur-ia maginur, saka pei sasa ambangyima nubuyima jajar lennir akümba-a angutsü. Atangji, Tsüngremi nisung shia nem sempet balala lemsüktsü asünung, nisung shia lenmang balala aser yimya balala nungi lennir akümstsü akok.

Israel kin Ijip lima nung, alar tia nung aliba nungi anitetsü asoshi Mosa Israel-purtem madak lennir asütsü Tsüngremi shimtet. Ajisuaka, Mosa-i kangasa memulung, saka Tsüngremi odang kangshia ajaba angur. Mosa-i Tsüngrem dang, ni Farao chuba dangi orr jembinung, Farao chubai kü dak mamangtsü aser ozü nuburtem-ia kü dang mangatsü. Ano aji dang masü, ni o jembitsü temeli mekiki...ta Mosai küli aika ashi. Ajisuaka, Tsüngremi Mosa Israel nung madak lennitsü odang shimtetba aser pa nem mapaji nungloktsü. (Anitet-3:1-11; 4:1-10 nung angutsü). Ano Tsüngremi Yerimia ainkar asütsü aja, saka Yerimia-ia kanga memulong. Yerimia-i koda jembitsü ni memetet, kechiyong ni tanür ka dang...ta ashi. Ajisuaka, Tsüngremi Yerimia dang ashi, ni tanür ka dang ta teshi, kechiyong ni na shir dangi yokdir na aotsüla, aser kechisa ne dang meladir nai jembitsüla...ta ashi. Tsüngremi Yerimia-i memulong-aka odang kangshia aja aser mapaji nungloktsü. (Yerimia-1:4-10 nung züngra angutsü).

Ano nisung karbo ken o nunga tetangshi, o junga jembiteter sernung, Tsüngremi meshimba-a angutsü. Mosa tedi Aron o kanga junga jembitetba nisung ka suaka, Tsüngremi pa Israel nung madak lennir asütsü meshimtet. Mosai Tsüngrem dang tangar kang shima-ang ta ashidang, Tsüngremi nedi Aron na asoshi o tongdar asütsü, kechiyong pai o kanga junga jembiteter...ta ashiba angur. Aron-i o junga jembitetyongjia Tsüngremi pabo Israel nung madak lennir asütsü meshim (Anitet-4:13-16 nung züngra angutsü). Ano karbo maja aser meshim sernung pei sasa jangraba karbo angutsü. Yisu alima nung alidang kenu pa dangi Tezulur ka aru aser pa dang...Kibuba na kolenisa odir ni ne sulen anidakdi...ta ashiba angur. Ashiko, iba tezulur yagi Yisu nutsüng ka asütsü jangra-a liasü sudi....Saka Yisui pa dang 'Na kü sulen anidakang'...ta mashi. Saka Shirongtem lungki kar aser anung ozütem tesepe kar, saka nisung chir tekolak atalokdak maka...ta dang langzür toktsüba ba angur. (Mathi-8:18-20 nung züngra angutsü). Ano nisung karbo nubur madak lennir asütsü Tsüngremi shimtetba sernung, Tsüngremi sentoktsüsa pei sasa peijenjang raksaba lennir karbo angutsü. Tsüngremi Saul Israel nung chuba asütsü shimtet, saka Saul chubai Tsüngrem jashitsüsa inyaknungji, Tsüngremi pa sentok. (1 Samuel-15:10-11. nungji züngra angutsü).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nicaragua nung sorkari pastor tem aika jail nung puokogo



Yaküm Nicaragua nung Mountain Gateway ministry nungi missionary, Britt Hancock-i evangelistic sentong ka nung jembidang tangokba noksa nung angur.

February 04, 2024: Nicaragua nung evangelistic sentong aika agiba sülen sorkari pastor tem aika jail nung puok aser America nung missionary tem anema ken o benokogo.

Mountain Gateway ministry nungi missionary, Britt Hancock leniba nung yaküm Nicaragua nung evangelistic sentong aika agia liasü aser item sentong nung nisung million 1 jungnüa aden.

Ajisüaka Hancock den par jabaso Jacob aser Jacob kinüngtsü Cassandra nungeri senotsü tsütsü ochimashi mapa inyakogo aser ozüing alema inyakogo, ta parnok nem tai tonglokja lir.

Nicaragua nung attorney general-i, Mountain Gateway nungi Nicaragua nung pastor 11 anema-a kasa tai tonglokja ken o benoka lir, ta metetdaksü.

Mountain Gateway-i, "Tai tonglokja aliba ajakji tiyazü, ta Mountain Gateway-i yimjak nung sangdonger, aser item tatalokba atema jashir. Mountain Gateway-i US aser Nicaragua naprongla nung non-profit NGOs aser yimsü dak sendakba organizations atema latetja aliba ozüingtem kübok inyaker," ta metetdaksü.

"Tai tonglokja ken o benoka aliba ya osang tai nung ajemdaker benokba ken otem lir, aser iba mangatetep bentettsü atema Mountain Gateway-i ketdangsertem ajanga inyaksü," ta parnokisa metetdaksü.

Yaküm missionary Hancock leniba nung Nicaragua linük tesem balala nung evangelistic sentongtem agiba sülen tang pa anema tai tonglokja ken o benoker.

"Yaküm Tsüngremi nisung aika taneptsü ngudaksüba, talenba salatsüba aser nisung aika taküm melenshidaksüba ni nguogo. Tang ozü pastor tem aser kü tembarten jail nung puoka aliba atema ni kanga jashir aser teblemtsü akar," ta Hancock-i osangbener nem metetdaksü.

Hancock aser par kibong kecha timtem makai Nicaragua linük nungi US-i ogo, ajisüaka iba linük nung jail nung puokba

pastor tem yaritsü atema pai inyakdar.

Paisa, "Nicaragua sorkari onok indang budget ajak repringhia agizüka liasü, ajisüaka onoki kanga meimba linük ka nung onoki akokba tashi teyari agütsüyonga tang tatalokbatem ya ni mangateter aser süngmanger," ta metetdaksü.

Nicaragua sorkari sangdong ka ajanga, pastor 9-ibo aibelena mali, ajisüaka US senso asem (Hancock den par jabaso Jacob aser Jacob kinüngtsü Cassandra) den tang puoka aliba Nicaragua nung pastor ana kübok parnok inyak, ta metetdaksü.

Sorkari pastor 9-ibo aibelena mali, ta shiaka pastor temji ita ana jungnüa jail nung puoka lir aser parnok kibongtem den-a tongtepratep mesüdaksü.

Hancock-isa, "Kibubai onok dang osangtajung prokba sentongtem agitsü asüingdanga liasü, anungji iba atema Tsüngremer sentong ka lir ta ni amanger. Laishiba nung, kong reshikangshi lidir yangji Arogo ainer ta shia lir," ta metetdaksü.

"Pai mapa inyakdar, Pai langka inyadar," ta pai ashi.

"Pastor tem chiochtsü atema onok den külemi sarasadem nung shilem agiang. Parnok kibongtem atema sarasademjang aser Nicaragua nungertemi maneni Yisu Khrista ajurutsü atema sarasademjang," ta missionary-isa mepishia metetdaksü.

Nicaragua nung nütsüing million 6.9 lir aser iba nungjagi nütsüing shilem 95 (million 6.5) bo Khristantem lir, ajisüaka sorkari Khristantem anema inyakba kanga bulua akümer.

2018 küm linük nung nüburtemi sorkar anema longkak aitba mapang nungi tenzüka sorkari Khristantem anema inyaker.

2018 küm Ortega-i aniba sorkar anema nüburtemi longkak aitba mapang nung Pastor Dario leniba nung Khristantem telok kati longkak aiteritem atema sarasademtsü aser yirua alirtem yaria liasü. Iba sülen ketdangsertemi, pastor

Dario-i rara ajungshir aser sorkar anema inyaker, ta pa nem tai tonglokja liasü.

Khristan lenirtem amokmerener aser apur, Khristantem kiojen pua ayur aser Khristan school tem, Khristan TV stations aser charities aika shibangtsüogo.

Sorkar ketdangsertemi Arogotem inyaksangshi mita repranger aser amokmerener.

Yaküm Easter mapang nung police-i Khristantem yimdong süa jajaba nokdanga liasü. Tawa ozüing tasen kar yanglushiba sülen nungi Arogo lenirtemji kiralongrarterem aser sorkar anema asalentong yanglurtem ama züngshir.

Sorkari Arogo nung inyaksangshi azüoktsü tebilemba lir, talisa ter-shilem aser tenla bendenba ajak azüokner, ta osang angazüker.

ANOGO ABEN TSÜNGREM DEN

Tsüngremi temepishitsürtem bushir

Ni parnok rongnung jaraji yanglutsü aser linük kümzüksü teraksa nokdanga, ni aji raksatsü aliba nungi noktangtsü nisung ka bushidang saka ni kata mangu. Ezekeil 22:30

Shirnok temulungjang Tsüngrem tsüngdang renema lir itemji temepishitsür asütsü Tsüngremi bushir. Temepishitsürtemji Tsüngrem mulungjang anasa alir. Parnoki parnok lima kechi timtem lir aji metetta alir, aser Tsüngrem nungi telangzüba mangu tashi Tsüngrem tsüngdang noktaker. Ibayongji na temepishitsür ka makümer. Tsüngremi züludena lir.

Kechiba asenoki memepishir? Tsüngrem tentanger ama asenoki bilemer asütsü akok. Tsüngremi asenok melangzüksü ama bilemer asütsü akok. Saka shibai asüngdang pai angutsü ta Tsüngremi nangzüka kar (Matt. 7:7). Asenok anogo shia mapa nung takok ngua odar anungji sarasademji menüngdak ta aseni bilemetsü akok.

Yisui Pa nungi pilar nenoki kecha meinyaktettsü ta tekümdangtsü agütsü (Yn. 15:5). Tsüngrem den tesendaktep lia Pai mulungba maden tashi asenok mapa ajak amajok asütsü. Tsüngremi mulungjang asenoki mangatetba agi memepishir asütsü akok. Yisui Yirusalem asoshi mepishidang Pai ajeb (Matt. 23:37). Asenok mulungjang chichiba Tsüngrem temeim lira shirnok Tsüngrem O bendangdaki arutsüba lir, parnok asoshi asenoki Tsüngrem tsüngdang mepishitsütsü.

Temeshibaji azüngmeyaka inyakba mapa ka lir. Anogo aika mesüra küm aika nung nai inyakba nungi tera dang angutsü akok. Aji saka, temepishitsürji kibong ka aser Tsüngremer O bendangba tsüngda, mesüra kija aser kin ka tsüngdang Tsüngrem ain adokba tsüngda noktakerem lir.

Tekülem sentong ayongzükba atema nisung ka tepuokdak ayutsü



Nay Y Blang anema ken o angadanga mapang tangokba noksa nung angur.

February 04, 2024: Vietnam nung Montagnard Khristan arrshi küm 48, Nay Y Blang-i par kidang sarasadem sentongtem ayongzükba agiba atema pa küm pezü ser tesadang tepuokdak ayutsü obendang agütsüogo.

Central Highlands Evangelical Church of Christ nung züngsem, Blang anema ken o angadanga aruba sülen taküm January 26 nü pa aitsüogo.

Pai linük anema apusotsü atema tangartem ajungshia liasü, ta pa nem tai tongloktsü.

Tamalen-a Blang dang senchi achiba den külemi tepuokdak-a yua liasü.

2005 küm April ita nung Phu

Yen province nung ketdangsertemi, Blang-i 'Unity policy' anema inyaker, ta tai tonglokja küm pongu ser tesadang tepuokdak ayutsü atema obendang agüja liasü aser yaküm September ita nunga Blang-i democratic temeden aser yimsü temeden tim mesüi amshioogo, ta tai tonglokja Song Hinh district People's Committee-i pa dang Vietnam nung Dong sen million 4 senchi achi.

Central Highlands Evangelical Church of Christ Arogo nung züngsemtem ya Montagnard lisopur Khristantem lir. Montagnard telok nung kin 30 shi lir.

Montagnards lisopurtem

teimbaka Khristantem lir aser parnok teimbaka Vietnam kübok central highlands nung alir. Akhidang parnok Vietnam sorkar den raraa aruba puti otsü lir.

Christian Solitary Worldwide (CSW) tentetsang aser Tir, Mervyn Thomas-i, "Court nung Blang aser Montagnards nung 100 dak tema anema ken o angadanga mapang nung inyakyim meshidakba (ken o jembitsür memelaba) atema CSW-i teblemtsü akar," ta metetdaksü.

Thomas-isa, "Vietnam sorkari sarasademjang sorkar anema amokmeren ka lir ta züngshir. Pei yimsü temeden beshiba atema jail-i aitsü asoshi shingaia metsübuttsü," ta ashi.

"Tawa tatalokbatem ya ajanga Vietnam nung meimchir temeden jenjang maneni tamajungba dang akümba kuli sayur. Iba ya Vietnam tesem ajaklen yimsü aser nütsüing ajema aliba lisopurtem anema inyakba ama onoki züngshir. Onoki Vietnam sorkar dang linük tesem ajaklen nütsüing ajema aliba lisopurtem amokmerenba anenang ta mepishir," ta paisa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Shishi

(v) ayokba aser aliba (buy and sell)

* Dimapur ya shishitsü tesem tajung ka lir.

Shishi

(n) arem shirurui ngoseta chir yutsüba shi (remains of animal killed by wild animals)

* Nisung aikati shishi machir.

OLONG PAITEP # 6688

Grid for OLONG PAITEP # 6688 with numbers 1-15 and shaded cells.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latetsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazuoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6687 TELANGZÜBA

TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sujuk, 10. Aonung, 11. Dokan, 13. Tinu.

NAI-A YA METETTER MA

Lok Sabha nung constituencies den state shia menden yamai lir :

(Yashi adok nungi...)

Table with columns for State, and numerical data for Lok Sabha constituencies.

Meghalaya sorkari school curriculum nung Koch oshi benoktsü



Shillong, February 3, 2024

(Agencies): Meghalaya state sorkari Koch tesemtem nung aliba school nung Koch oshi benoktsü tebilemtsü lir ta Chief Minister Conrad Sangma-i ashi. Meghalaya Koch Association-i Jatrakona nung 54 buba Annual Koch Conference nung jembidang CM Conrad-i iba osang metetdaksü. Paisa Koch nunger

tebilemtsütem asoshi inyaktsü aser tongtipang mapatem asoshi olemteptsü nangziük. "South Garo Hills kübok Jatrakona nung Koch adianutem den 54 buba Annual Koch Conference nung adener" ta Conrad-i metetdaksü. Iba mungdang nung pai lisopur oshitem wazüka ayutsü jembida aser school tem nung Koch oshi benoktsü atema

sorkari asadangtsü nangziük. "Association-i Koch nunger asoshi capacity building aser oshi wazüka ayutsü indang memorandum ka agütsüogo. Ni item asoshi mapa inyaktsü nangziükogo" ta CM Conrad-i ashi. PRIME, CM-ELEVATE aser YESS Meghalaya ajanga Koch nunger lanurtem tashi aittsü lenmang lir, ta paisa ashi.

MoS Teli-i Chirang nung Hindustan Petroleum depot semdang

Guwahati, February 3, 2024

(Agencies): Union Minister of State for Petroleum & Natural Gas, Rameshwar Teli-i Honibarnü Assam kübok Chirang district semdang. MoS Teli-i Khagrabari nung Hindustan Petroleum indang depot aser bottling plant yanglutsü aliba tesem semdanga liasü. Iba mapang Hindustan

Petroleum ketdangsurtemi Teli meina ao aser tang tashi nung inyaka aruba mapa repringdang. Iba mapatong ya ali bigha 238 alizükba sülen tenzüko. "Rs 525 crore jungnüa endoka yanglutsüba mapatong atema yakta lung azüngtsü. Iba mapatong renemba sülen Bodoland Territorial Council (BTR) nung mapa adoktsü

aser renloktsü" ta MoS Teli-i ashi. Iba tesem semdangba sülen MoS Teli-i Bongaigaon Refinery nung ketdangsurtem den senden ka amen aser idangji onük aika lemsatop. Bongaigaon Refinery indang arrtsü ulushitsü atema jembioigo aser iba atema BTR bangdakpurtem den jembitepdar, ta Teli-i ashi.

Bengal nung MGNREGA worker lakh 21 nem sen agütsütsü: Mamata

Kolkata, Tsüklai/February 04 (Agencies): State nung MGNREGA workers lakh 21 indang bank accounts nung February 21 tashinung ozü sorkari sen inoktsütsü, ta West Bengal Chief Minister Mamata Banerjee-i Honibarnü sangdong. Social welfare scheme balala atema Centre nungi tagütsütsü sen magütsüi aliba agüjang ta BR Ambedkar statue jakdang Hokulbarnü nungi tenzüka ghonda 48 atema longkak ait tenzüka alila Trinamool Congress tetsüti-isa Awasi Yojana atema sen agütsütsü atema tekeraba nung sangdong agütsütsü ta ashi. "Asenoki BJP dang nungi memeshiner mesüra parnok teyari maginer. Tesüba küm asem tsüngta anogo 100 mapa

inyakba scheme (MGNREGA) atema central sorkar nungi sen mongui alir parnok nisung lakh 21 indang bank accounts nung onoki sen inoktsütsü. Ibai kü indang mera mezüngbuba alitsü," ta Banerjee-i longkak aitba tesem nungi sangdong. "Central sorkari Bengal ya yaseta südaktsütetsü amai bilemer. Asenoki yangji parnok nem takok mongudaktsütsü.... Kü dak tamang kaang... Senotsü magütsüi anendaka aliba meilongi agütsütsü asoshi ni mera agütsü," ta lai ashi. "Iba rara ya pei shilem mangua nürburtem asoshi lir. Asenoki maneni raratsü aser Bengal nung sensaker kata pei shilem mangu metoktsütsü. Ni takum ali tashi nenok asoshi ni raratsü," ta West Bengal CM-i ashi.

Lar party-i Lok Sabha election atema tashi ajak amshia tokteptsü aser opposition party ajak lungjemer nokdakra Centre nung aliba BJP sorkar laotsüsa, ta lai ashi. "Ni ajak amshia asayatsü aser ajak nung takok angütsü. States ajak, frontal organisation ajak aser regional party aser national party ajunga tejakleni arura, BJP laotsü ya tejangja. BJP-i parnok mapang talangka alitsü aru ta bilema lira aji tai. Parnoki linük nung aliba nürburtem mapang talangka reshikangshioigo," ta lai ashi. Banerjee-isa state nung Citizenship (Amendment) Act (CAA), aser National Register of Citizens (NRC) mapa kuma amshitsü kodanga memelatsü, ta nenshia ashi.



"Mission Prakriti" sentong kübok lipajen wazüka ayutsü asoshi meranga inyakba mechi Assam nung school pongu nem sempet agütsü. WWF-India aser Samagra Shiksha, Assam lungjemer tenzüka Mission Prakriti sentong kübok Dibrugarh Government Girls' HS & MP School, Joktali Higher Secondary School (Sivasagar), Nutan Kanchanpur ME School (Cachar), Dandua MV School (Morigaon) aser Dawson HS & MP School (Nagaon) nem iba sempet agüja liasü.

US aser UK nati asendenshir Houthi telok amak

Washington, Tsüklai/February 04 (Agencies): United States aser United Kingdom nati Yemen nung Houthi teloki azioker aliba tesem kar makogo, shirnoki Palestine pusema US aser Israel nung tamendakdak balala maka arudar.

Honibarnü tesem balala amakba den bendenloksema US Central Command (CENTCOM)-i Deobarnüia Houthi pur indang antiship missile ka raksatsüogo, koba Temerem tsüym nung rongtem amaksü asoshi renemer liasü. Temerem tzüym nung Bab al-Mandeb strait nung Houthi teloki Israel den sendaka aliba rongtem amakba ajanga alima nung shishiImba dak kongshiogo aser iba ajanga US aser UK nati telangzüba agütsütsüsa aküm.

November ita tom nungi Houthi teloki Israel den sendaka aliba rongtem aser US aser UK na indang military warship tem missile, drone aser rongtem amshia maka arudar. Parnoki ashiba agi Gaza nung Israel sottsü atema iba jenjang agir. Houthis purisa Gaza nung Israel nem humanitarian teyari agütsüdahtsütsü atema takhangba ka agütsüogo, kong nütsünyongsük million 2.3 ya tzüra agi meneper lir.

Taoba hopta Jordan nung US nung sepai asem tepsetba dak sendakba nung US-i Hokolbarnü Iraq aser Syria nung Iran indang Islamic Revolutionary Guard Corps (IRGC) den sendaktepa aliba tesemtem amakba sülen tang Yemen nung Houthi pur tamendakdak makogo.

Jordan nung sepaitem

amakba ya US Iraq nung Islamic Resistance dak tai tongloktüogo, shirnok Iran den sendaktepa aliba telungpur teloktep telok ka lir. Tehran-i iba tesem drone amshia amakba nung parnok densema mali ta shia arudar.

CENTCOM-i ashiba agi, parnoki Australia, Bahrain, Canada, Denmark, Netherlands, aser New Zealand teyari agia Yemen tesem balala makogo. Honibar aonung ayaterem nung parnoki tesem 13 nung target 36 maka liasü, ta US, UK aser parnok nem teyari agütsüba linüktemi külem sangdong ka ajanga metetdaksü.

US aser UK nati parnoki koba tesemsa amak iba indang osang tejangja magütsü, ajisüaka Houthi military otongdar Yahya Saree-i ashiba agi, linük yimtiba Sanaa aser Houthi teloki amokbanger aliba tesem balala makogo.

Saree-isa ashiba agi, Sanaa aser temeket nung aliba tesemtem 13, Taiz nung 11, Hodeidah nung teku, al-Bayda nung tenet, Hajjah nung tenet aser Sa'dah nung 1 densema governorates ishika nung tesem 48 tashi makogo

Sanaa nung aliba nüburtemi online ajanga video lemsatepba nung bomb apokba ola tulu angashiogo aser ano bomb ka poka aonung anüing sawadaksüba nguogo.

"Item tesemtem amakba ya melangzüibo metoktsütsü aser merenshitsu," ta pai ashiba den Palestine nung nem teyari agütsütsü atema parnok masetshi-i lir, ta shisem.

Iran indang Ministry of

Foreign Affairs otongdar Nasser Kanaani-ia Deobarnü sangdong ka ajanga Yemen nung tesem balala amakba aitsüogo aser ashiba agi, iba ajanga alima nung yimjung aser security raksatsür aser Washington o London nati parnoki iba tesem nung rara prokshia modaktsünür ta ashiba anema lir.

Kasa mapang nung US Defence Secretary Lloyd Austin-i, Houthi puri parnok inyakyim manenra parnoki maneni tesem balala amaksü. Honibarnü tesem balala amakba densema US aser UK nati tang agi tasembenbuba Houthi telok tamendakdak makogo.

US-i Iraq amakba mapang nisung 16 tashi asü, koba Washington-i ashiba agi, Jordan nung drone amshia US nung sepaitem tepsetba atema telangzüba agütsüba mezüngbuba jenjang dang lir.

October tom nungi iba tesem nung US aser parnok den sensaktepa aliba sepaitem 165 ben tashi makogo, koba timba Iraq aser Syria nung atalokogo, ajisüaka Jordan nungang tang mezüngbuba nisungbo süogo.

Item linük nung Iran den sendaktepa aliba teloktemi ashiba agi, US tamendakdak amakba ya tim dang kechiyong Washington-i Gaza nung rara mapang Israel nem military aser diplomatic teyari agütsür.

Iran, Iraq, Syria nungeria iba tesem amakba aitsüogo aser Russia-ia Syria ti Bashar al-Assad pusemogo aser United Nations Security Council senden ka jazükogo, koba Hombarnü New York nung agütsü inlar.



February 04 : Chile nung mi agi gari rongdoker aliba anasa nisung senzüba noksa nung angur. Chile nung morok mi adokba ajanga nisung 46 shi süogo aser ki 1,100 dak tema rongdokogo ta ketdangsür temi ashir. Iba morok mi mechi Chile Tir Gabriel Boric-i linük central aser south tsütsü state of emergency sangdonga lir.

Namibia Tir Hage Geingobi süogo



Windhoek, Tsüklai/February 04 (Agencies): Namibia Tir Hage Geingob arishi küm 82 nung süogo ta pa indang office ajanga ashi, shiba cancer atema treatment ka agütsü ta sangdonger hopta asem majungdang iba osang ya angashir.

Geingob ya Deobarnü linük yimtiba Windhoek nung aliba Lady Pohamba Hospital nung asü aser iba mapang pa kinungtsü aser tanurtem pa anasa liasü, ta acting president Nangolo Mbumba-i Geingob indang Facebook page nung sangdong ka agüja liasü.

"Namibia linük asoshi linük tenzüker tongtipang nisung ka süogo, nüji asoshi nokdaker, asen constitution yanglur tongti aser Namibian house indang tongshi," ta Mbumba-i ashi.

"Tang mangyim tejashi mapang nüburttem dang süngjema alitsü ajungshir aser sorkari nungdakba mera ajak agütsü. Iba atema ano maneni sangdongtsü."

Teti ama colonoscopy aser gastroscopy agidang "cancerous cells" ngutetba sülen temang anepalu tenzüker, ta taoba ita Geingob indang office-i sangdonga liasü.

Iba sangdong nung pa dak iba tashidak putetba tejangja mashi saka pa mapa shidak inyaktsü ta shia liasü.

Iba sülen Geingob indang office ajanga sangdong ka nung pa temang anepalutsü atema United States-i aotsü aser February 2 nü linüki meyipa shilangtsü ta shia liasü.

Geingob ya ato kilonser ama küm 12 inyaka liasü aser 2014 küm Namibia indang tir tasembuba inyaktsü election agidanga temang nung timtem liasü.

2013 küm anti-apartheid activist nungi yimten yimsüsür akumsang ya brain surgery agia liasü aser 2014 küm pa prostate cancer nungi jenbuogo ta osang temai adoka liasü.

Taoba küm Geingob-i pa kidanger South Africa linük nung aortic surgery agiba sangdonga liasü.

Taoba mapang Germany kübok aliba Namibia ya 1990 küm South Africa nungi nüjiso angu aser November ita tir aser parliamentary elections agütsü sentong lir.

Geingob ya election nung tokteptsü metemsü, kechiaser Namibia indang constitution nung nisung kati linük tir kümsük ana tashi dang inyaktsü shia lir.

Tang sorkar tenteta aliba SWAPO Party indang tir candidate Nandi-Ndaitwah ya shimtetra linük nung tetsür mezüngbuba tir inyaker akumtsü.

South Carolina Democratic primary nung Biden-i akok



Columbia, Tsüklai/February 04 (Agencies): United States Tir Joe Biden-i South Carolina nung Democratic primary ayong-ayonga kokogo aser iba sülen pai Republican nungi pa den tokteptsü alisang Donald Trump ya November ita election nung tanaben tamakoker kumdahtsütsü nangzük.

Honibarnü South Carolina nung Biden-i Democrats nungi Minnesota Congressman Dean Phillips aser kaket zülur Marianne Williamson nung madak takok ngua liasü.

Democratic party nungi 2024 tir election asoshi tokteptsü atema mezüngbuba vote

agitepba nung Biden-i vote shilem 96.4 angu ta osang ajanga ashir.

Arishi küm 81 tain Biden-i Black voters tem atsür aruba Democrats temi asadangtsü, shirnoki pa arishi küm 77 tain Trump makdak takok ngudakja White House nung mendaktsü.

South Carolina ballot osang aruba mapang Biden ya California nung nübuyima jaja liasü.

"Tang 2024 nung South Carolina nüburttem maneni jembiogo aser iba tir menden tanaben akoktsü lenmang nung ni yutsüba nung temulung arendaka bilemstü mali aser

Donald Trump ya ano tamakoker kumdahtsütsü," ta Biden-i sangdong ka nung ashi.

Pai nüburttem dang November ita vote agütsütsü ajungshia liasü.

"Donald Trump-i anir linük nung lendong tulu aketba ola agi mapa inyaker," ta pai ashi.

Küm pezü jakdang South Carolina state primary nung Black vote ajanga Biden nübuyim nung milak jangrudaktsü aser tatem nung pai takok angu.

Taküm bo Black electorates timba aliba South Carolina nung teimla kangabo meliasü aser ano aikati pa tain akumba, high consumer prices aser US-Mexico arütsülen security indang bilemer.

1976 nungi tenzüka South Carolina nung general election mapang Democrat nungi tir atema tokteper yaria maru. Ajisüaka iba state nung aliba Democratic electorate ya tesadang ka dak tema sentsü tanak nisungtem lir, anungji Biden asoshi iba state ya kanga tongtipang lir.

